

INUIT ATAQATIGIIT INATSIARTUNI



UKA2022/96

Ulloq saqqummiivik: 26. Oktober. 2022

Illit atit: Mariane Paviasen

**Meeqqat atuarfianni angajullerni inuussutissarsiutitut sammiveqartut
atuartitsissutitut neqerooruteqarsinnaalernissamik
periarfissiisinnaaneq pillugu Naalakkersuisut UKA2023 nallertinnagu
nalunaarusioqqullugit aalajangiiffigisassatut siunnersuut.**

(Inatsisartunut ilaasortaq Aqqalu C. Jerimiassen, Atassut)

Siunnersuuteqartoq pingaartutilimmik siunnersuuteqarneranut Inuit Ataqatigiit
sinnerlugit qutsavigaara.

Siunnersuutaa arlalitsigut isumaqatiginarpoq, meeqqatta atuarfimmi
atuartinneqartarneranni amigaatiginarsorisaminik qaqitsivoq, isumaqatigaarput
ugguuna meeqqat atuarfianniit meerartatta siunissami inuunerminni
suliarissallugu pilerigisaminnik ilinniarfigerusutaminnik, kingornalu
inersimasutut suliarerusutaminnik takorluugaqareerlutik ingerlaqqittarnissaat
kissaatiginartorujussuummat.

Unalu aamma oqaatigerusunnarpoq nunatta namminiilernissaannut
pisariaqartilluinnarparput innuttaasut aamma amerlanerpaat nammineerlutik
suliffiuteqartut, nammineerlutilluunniit suliffeqarfiutilinni suliffeqalersinnaasut
amerlanerulernissaat anguniagassaasoq pingaaruteqarluinnartoq. Pisortanimmi
maanna isumalluuteqarnek anertuallaarpoq.

Siunnersuummut Naalakkersuisut akissutaanni paasinarpoq
Naalakkersuisoqarfiup atuartitsissutinik ilikkagassatut anguniagassanik
Namminersorlutik oqartussat nalunaarutaanik nutarterillutik aallartissimasut,

INUIT ATAQATIGIIT INATSISARTUNI



siunnersuuteqartullu angunigaannik imaqartinneqareersoq. Aammattaaq eqqaaneqarpoq meeqqat atuarfianni atuartitsissutigineqartartoq "Inuttut inerikkiartorneq" ilinniagassanut inuussutissarsiutinullu sammisaqartitsiviusartoq taanneqarluni, taasumap saniatigut atuartitsissutissanik kiffaanngissuseqarneq eqqaaneqarluni.

Naak Naalakkersuisut siunnersuummik oqariartuuteqaraluartut siunnersuuteqartup siunnersuutaata suliarineqalereenera suliarineqaqqilernereralu innersuussutigalugit Inuit Ataqatigiinni isumaqarpugut maannakkut meeqqat atuarfianni atuartut naammassisartut suli amerlavallaartut siunissami sulerilernissaminnik nalorsartunik, naak meeqqat atuarfiisa sulilluarlutik sapinggisartik tamaat suliniuteqaraluartut.

Inuit Ataqatigiinni kingullermik ataatsimeersuarnitsinni anguniagassatut siunniunneqartut ilagaat Nunatsinni meeqqeriviit atuarfillu suleqataaffigissagaat meerartatta inuttut nammineersinnaasusilittut alapernaatsutullu sakkussaqaartinneqarnerat annertusarneqassasoq, aammalu ilinniaqqinnissaminnut sapiissuseqalersinneqassasut.

Isumaqarpugut meeqqatta inuiaqatigiinni oqaatsit tunngaassigut assigiinngisitaartunik atuiffigineqartumi nunatta oqaluttuarisaanera pillugu ataatsimoortumik ilisimasaqarnissaq pingaaruteqartoq, tassuunakkummi aamma imminut tatiginerulerneq annertusarneqarsinnaammat, siunissamilu nunatta ineriartortinneqarnissaanni siulitta nunatsinni siuariartortitseqataasimanerat siunissami takorluuisinnaanermik aamma pilersitsissasoq isumaqarpugut.

Suliffeqarfanni nammineq napatissinnaasunik pilersitsissagutta toqqammavitta ilisimaarilluarnissaa aamma pingaaruteqartuusoq

INUIT ATAQATIGIIT INATSIARTUNI



oqaatiginngitsoorusunngilarput. Nunarsuarmioqataanitsinnilu immikkuullariffigisagut, assigiinngisitaarlutalu inuunermi ingerlatsinermi meerattatta inuusuttortattalu ineriartorteqqitassaannut pingaaruteqarluinnartuuvoq angajoqaat, meeqqeriviit, meeqqat atuarfiisa, oqartussaasullu suleqatigiilluarnissaat, pitsaasunik sinaakkutinik pissarsissagutta ilisimasaqarluinnartortagut suleqataasariaqarput.

Unalu pingaartillugu eqqarsaatissiissutigisariaqarparput Pitsaasumik ineriartortitsissagutta suleqatigiinnissaq annertoq pisariaqarpoq inoqatit allat kukkunersiuvinarnagit, oqaatsinik sorlernik atuisuunerinik uparuartuinata immikkut piginnaaneqarfitta ersarissarneqartuarnissaat pingaartutut isigaarput qinikkatullu uagut maani pisussaaffeqarpugut annertuumik suleqatigiinnermik maligassiuvillutalu ineriartortitseqatigiinnissarput.

Taamakku oqaatigalugit Inuit Ataqatigiinniit siunnersuut una iluatinnaateqartutut oqaatigisariaqarparput, Naalakkersuisullu itigartikkaluaaraat suliat aallartereeneri pissutigalugit isumaqarpugut ataatsimiititaliap suliap uumap maannakkut sulianut ingerlareersunut ilanngullugu suliarineqarsinnaanera misissuiffigitikkusupparput.

Taamaammat Kultureqarnermut, ilinniartitaanermut ilisimatusarnermut ilageeqqarnermullu ataatsimiititaliamut ingerlateqqipparput.

Qujanaq.